

***Nouvo***

Newsletter of the Seychelles National Party  
Vol. 17 Nimero 21 (20 Novanm 2008)

# ***Vizyon***

## **SESELWA I DIR**

# **ASE SOUFRANS**

Laplenn Roche Caiman i deborbe Dimans le 16 Novanm  
avek lakoler ek fristrasyon  
**Sa Pep i Ganny Ase!**



# Protez lepep silvouple! Albert René ki FOU!

**E**n keksoz i kler pour tou Seselwa: SPPF in abandonn lepep, e ozordi se zis sa ki annan ki pe ganny plis tandi ki sa ki pov in ganny met dekote pou fer fas avek sitiasyon lavi zot tousel. SNP pe enplor SPPF pou pa zet lepep Seselwa, me pou annan en vre leker e regard dan welfer nou pep.

Ozordi SPPF in met deor tou bann carers e bann dimoun dan lanbelisman e dan lezot program in fini ganny dir ki zot pou bezwen aret travay byento. Tou sa ki SPPF ti promet nou pep in ganny oublie, e dimoun i bezwen fer fas avek lavi san sa bann politisyen SPPF ki ti donn zot sa bann bon parol.

Eski sa i byen? Akoz ki SPPF pa mazin sa carer e sa travayer lanbelir ki ti osi travay koman en aktivis dan peryod eleksyon pou

anmenn bann parasol, t-shirt ek zot bann pape sal? Akoz zot in oublie sa bann pti dimoun ki ti fer sa travay ni menm pour en mersi ? Sa i vreman montre nou ki SPPF i en parti politik ki napa en leker pour Seselwa. Me ki zot plito zis rod servi dimoun e apre kit zot ater pou defann zot prop lekor.

SNP i dir avek SPPF ki fodre ki zot protez lepep kont sa lavi vreman ser. Fodre ki Mr. Michel avek son gouvrenman i vin avek en plan serye afen ki nou popilasyon i ava ganny proteze e dimoun pa ava pas dan sa kalite soufrans parey zot pe sibir ozordi.

SNP pou kontinyen fer sa demann, e nou pou osi ensiste ki tou nou popilasyon i ganny manze e komodite a en pri rezonnab, e ki bann fanmiy i kapab viv byen. SNP i la pour zot.

**L**a en pti zistwar ki ilestre ki se en fou ki kontan apel lezot fou. Sa i aplik pou Albert René, ki zour son laniverser in deklar mazorite lepep Seselwa fou.

En zour ti annan en boug ki ti fou. Sa boug ti kwar ki i en lagrenn mai. Zot ti met li lazil avek bi pou esey geri li. Apre en serten tan, sa boug ti komans dir ki i pa en lagrenn mai. Alor bann dokter ti deside larg li. Me zis koman i ti ariv devan baro lazil, i ti retourn anndan e dir avek sa dokter: Dokter, ou, ou konnen ki mon pa en lagrenn mai, mwan mon konnen mon pa en lagrenn mai, me sa poul laba, i konnen ki mon pa en lagrenn mai?

Wi, Albert René in fini fou. I ancor kwar ki i ou fer Sesel vin en pti bizou. In oublie ki se gras a li ki Sesel i dan sa salte ozordi, I en lagrenn mai, e i pou reste en gro lagrenn mai!

## SBC: Lavwa SPPF?

**D**epi le 14 Novanm SBC in retransmet 3 fwa sa diskour ki Mr. Michel ti fer State House. Kwa ki annan sitan enportan dan sa diskour ki SBC i bezwen repet li koumsa? Seselwa annou ouver nou lizye e anpes nou ganny anbete.

SBC, parey son labitid pe zis propaz mansonz ek propagann SPPF. Apre 32an opouvwar, SPPF in senpleman prouve ki i napa konpetans pou dirize. Rezilta zot move zestyon in met en det 800 milyon dolar lo Sesel. Plis ki \$2.5 bilyon nou larises i dan bann labank etranze.

IMF in forse desann limenm pour vin degaz lasasen. Alor akoz Mr. Michel napa kouraz pour dir lepep laverite? Akoz i pa zis admet ki in bite? Demann pardon i en sinny limilite.

## Lavi i tro ser dan Sesel

**T**ou dimoun pe koz zis lo pri lavi dan nou pei. Promes Mr. Michel pou fer desann pri lavi e met plis larzan dan pos Seselwa in fini evapore. Ozordi Mr. Michel i ganny tou keksoz dan dalo, me lepep Seselwa i bezwen trimouse avek sa bann pri ki kontinyen ogmante.

Tandi ki manze Mr. Michel i ganny kwi State House e ganny anmenn kot li, Seselwa i bezwen lager avek sa gas R23 en kilo ki fer ki sa pli pti boutey i kout R100. Mr. Michel pa santi sa soufrans akoz pour li tou keksoz i ok, e avyon i anmenn sa ki i manke san ki i bezwen pey GST lo la. Mr. Michel, akoz ou n oublie sa pep? Akoz ou n oublie kote ou sorti. Vre konmdir proverb, Zonn dan lopilans i oublie son nesans.

Mr. Michel, mazin bann pti trezor ki bezwen ozordi aste en bwat dile Lactogen R63 sorti R23, en limonad R15, en bwat Luncheon mean R32, 6 burger pour R52, en kilo poul R50, en pake pampers plis ki R200! Eski sanmenm sa ki SPPF i dir nou zot kontan nou pti trezor e zot pou protez nou zanfan?

Madanm Gamatis ti dir ki lontan Seselwa ti manz lavyann selman dan Dimans. Me eski i konnen ki lafason ki pei pe ale, byento Seselwa pou manz lavyann zis dan Dimans lafendimwan e lager avek lera lo mang?

Fodre fer desann pri lavi. Olye ki Gouvernman SPPF i mazin zis ranmas larzan pou satisfere IMF, i devret mazin nou pep e fer sa bann komodite ser desann. Lepep i atann.

## PAS PARTOU

### Lanmen Malediksyon

Tou sa ki SPPF i touse i fer fait. Alor fodre fer sir. SPPF in frot zepol avek Lehman Brothers, sa labank in fermen. SPPF in frot zepol avek lakonpanyen Lindenhau pou fer tenker, sa lakonpanyen in fait. La SPPF in frot zepol avek Carrefour, e nou fek tande i annan gro problemn e sa lakonpanyen i riske fait. Nou pe dir avek Lasin fer atansyon. Pa etone si zot ganny ancor plis tanblemann-d-ter ek lezot difikilte. Rezon pour sa i senp: SPPF i annan lanmen malediksyon. Zis get Sesel e ou ava konpran!

## SNP ANNUAL CONVENTION

### The Seychelles National Party

invites its members to its Annual Convention which will take place on

**Sunday 23rd November 2008** at the **International Conference Centre.**

The Convention will start at **3.00pm** and delegates are asked to be seated at **2.45pm.**

**Nou Tou Nou Pou La Pour Menm Rezon!**